

Kontuola

ANTZUOLA / Egubakoitza / 2002ko ekainaren 14a / 117. zenbakia


KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com

Tonbola jarriko dute jaietan Anelkarrekoek

AINZANE IRIZAR

Herriko jaietan tonbola jartzeko lanean dihardute Anelkarrekoek. Jaietako egubakoitzean eta zapatuan egongo da tonbola plazan. Horrela, jendeari zuzenean dirua eskatu beharrean, zerbait ezberdina eta parte hartzailea antolatu nahi dute.

Aurten, 10 urte bete dira Anelkar sortu zela. Hori dela eta, zerbait ezberdina eta, era berean, parte hartzailea izango dena antolatu nahi zuten. Horrelaxe sortu zitzaizen tonbola jartzearen ideia. Herriko denda, enpresa, artisau eta gainerako herritarrei euren laguntasuna eskatu diete tonbolarako sariak batzeko. Baita Bergarako dendariei ere. Enpresei, berriz, dirulaguntza eskatu diete; laguntza eman nahi dutenek honako kontu korronte zenbakietan eman dezakete: Kutxako 00 1087950.0 zenbakian, eta Euskadiko Kutxako 1213.3 zenbakian. Gainerako herritarrek, berriz, Kontxi Laskurain (943 76 60 62) edo Jabier Etxanizengana (943 78 70 56) jo dezakezue zuen laguntza eman nahi baduzue.



Batutako dirua Canudosen ur putzuak egiteko erabiliko dute, besteak beste.

BATUTAKO DIRUA, CANUDOSERA

Anelkar Brasilgo Canudos herriari laguntzeko sortu zen. Oraingoan ere hango hainbat proiektu bultzatzeko izango da

batutako dirua: hango familien dako ur putzuak egiteko eta Canudos eskualdeko nekazariendako hainbat lokal errentan hartzeko, besteak beste.

HIRIGINTZA

Hainbat lan egingo dituzte Antiguán

Antigua auzoko 1, 3 eta 5 zenbakien aurreko aldean eta autobus geltokiaren atzeko aldean berrikuntzak egingo ditu Udalak.

Alde batetik, hiru atari horien aurreko aldeko plazaratxoan kolektore sarea guztiz berrituko dute; izan ere, hainbat arazo sortarazi dizkie kolektoreak. Bestetik, plazaratxo oinezkoendako gunean hormigoi inprimatuzko lurzorua jarriko dute. Hormigoi inprimatuak harria edo bestelako materiala imitatzeko aukera ematen

du. Antzuolan era horretako materiala erabiltzen duten lehen aldia izango da oraingo hau.

Bestalde, oinezkoei lehentasuna eman nahian, Irimora hartzen den tokian dagoen oinezkoendako pasabideari altuera emango diote; baita espaloi berriak egin ere. Autobus geltokiaren atzeko aldean ere hormigoi inprimatuzko lurzorua jarriko dute. Azkenik, garajeetarako pasabideak eta aparkalekua asfaltatu egingo dituzte.



Lehen aldiz erabiliko du Udalak hormigoi inprimatua.

HERRI IKASTETXEA

Ikastetxeko jangela egiten hasiko dira

Uztailean hasiko dira Herri Ikastetxean jantokia egiteko lanekin; horrela, udako oporraldia aprobetxatuko dute, eta irailerako, datorren ikasturte hasierarako, jantokia prest egotea espero dute eskolako eta Pausokako ardurdunek. Hogeitabat umek eman dute izena datorren ikasturtean ikastetxean bazkaltzeko.

Gaur egun liburutegia dagoen tokian egokituko dute jangela; liburutegia, berriz, tokiz aldatuko dute, ikastetxeko beste gela baten jarriko dute.

HIRU LANGILE BEHAR DITUZTE

Pausoka Gurasoen Elkarteko ardurdunek azaldu digutenez, eskolako jantokian hiru langile beharko dituzte: bazkalorduan ikasleek arduratzeko bi begirale eta bazkariak arduratzeko den beste bat, hain zuzen ere. Lanpostu horietara aurkezteko eskaera orriak eskolako idazkaritzan daude eskuragarri. Interesa dutenek ekainaren 12tik 20ra dute lanpostu horietara aurkezteko epea, eskaera orria eskolara eramanez.

ERAKUSKETA

Pintura ikastaroko ikasleen lanak ikusgai

Aurtengo ikasturtean Pintura ikastaroan aritu diren ikasleen margolanak ikusgai izango ditugu asteburuan Olanen etxeko aretoan. Ohiko ordutegian egongo da zabalik erakusketa hori: zapatuan eta domekan, 12:00etatik 14:00etara, eta arratsaldean, 19:00etatik 20:30era, hain zuzen ere.

Urrian hasi zuten ikastaro hori, eta oraintxe amaitu dute. Antxon Arrilaga pintore bergararra izan dute irakasle. Marrazkia eta pintura landu dituzte,

batik bat. Irailean herritar askok eman zuen arren izena ikastaro horretan parte hartzeko, zortzi lagunek bakarrik bukatu dute, eta euren margolanak izango dira asteburuan ikusgai jarriko dituztenak. Ikasle bakoitzak hiruzpatalu lan jarriko ditu Olanen; hainbat motibo eta estilotako margolanak guztiak ere.

Duela hiru urte hasi zen Udaleko Kultura batzordea Pintura ikastaroak antolatzen, eta aurrerantzean ere izango ditugu era horretako ikastaroak herrian.

LABUR

Egaralur, Antzuola Udal Etxegintzako bazkide berria

Joan den astean egin zuten osoko bilkura, eta hantxe erabaki zuten Egaralur enpresa hautatzea Antzuola Udal Etxegintzako bazkide moduan. Gauzak horrela, laster hasiko dira Sagasti auzoan etxebizitzaren multzoa eraikitzen. Hama sei etxebizitzaren eraikuntza zuzen bi etxebizitzaren multzoen berdina izango da hirugarren hau. Udaleko ardurdunek adierazi digutenez, oraindik ez dago etxebizitzaren horietarako izena emateko aukerarik.

ELKARRIZKETA

UXUE ARREGI/GIMNASTA

“Euskadiko Txapelketan zorte txarra izan nuen; min hartuta joan nintzen”

A.I.

Maiatzean, Gipuzkoako Eskola Arteko Txapelketa irabazi zuen. Orain, Euskadiko Txapelketan hirugarren izan da. Maialen Toledo bigarren izan zen eta Iraitz Gastiain, berriz, zazpigarren sailkatu zen.

Denboraldi bikaina egiten ari zarete Antzuolako gimnastok, ezta?

Bai, baina baita Bergarakoak ere. Ni Bergaran entrenatzen naiz, Ariznoa taldearekin, eta denok egin dugu nahiko denboraldi ona. Euskadiko Txapelketan, alde batetik, zorte txarra izan dut, lesionatuta joan nintzen-eta: izterrean min hartuta nago. Bestetik, baina, zorte ona ere izan dut, lesionatuta egon arren hirugarren geratu nintzelako.

Zela hasi zinen gimnasia erritmikoan?

Eskolan proposatu ziguten gimnasia hastea; niri txiki-txikitatik gustatu izan zait gimnasia erritmikoa, eta animatu egin nintzen.

Antzuolan zenbat lagun ari zarete gimnasia?

Antzuolako lau neska entrenatzen gara Bergaran, Ariznoa taldearekin. Baina badaude Antzuolan bertan entrenatzen direnak ere.

Mutilak ez al dira, bada, animatzen?

Ez, Antzuolan, behintzat, ez; izan ere, beti pentsatu izan da nesken kirola dela. Nik mutil bakarra ezagutzen dut gimnasia dabilena, eta oso ona da, gainera.

Kirol gogorra omen da.


Bai, gogorra da, ordu asko sartu behar dira; baina, ez dugu beste batzuk adina ordu sartzen.

Zenbat entrenatzen zara?

Astean lau egunez, egunean bi orduz.

Ze ezaugarri behar dira gimnasta on bat izateko?

Batez ere, elastikotasuna da garrantzitsua; ez dago argal egon



AINZANE IRIZAR

“Astean lau egunez, egunean bi orduz entrenatzen naiz; beste batzuk baino askoz gutxiago”

beharririk. Ezagutzen ditut gizen samar egon arren, oso gimnasta onak direnak.

Entrenamenduez gain, zainketa bereziren bat ere beharko duzue, ezta?

Ez; ez daukagu dietarik eta horrelakorik. Profesionalak, bai,

“Gimnasta ona izateko, batik bat, elastikotasuna oso ezaugarri garrantzitsua da”

asko zaindu behar izaten dira. **Ze asmo daukazu aurrera begira?**

Entrenatzen jarraitzen dugu, baina denboraldia amaitu dugu. Datorren urtean jubenila izango naiz, eta ia zela moldatzen naizen maila berrian.



Debagoieneko erretiratuen kirol jaia

Ibarreko ia 500 erretiratu elkartu ziren joan den egubakoitzean Antzuolan, Mankomunitateko Kirol Zerbitzuak antolatutako kirol jaian parte hartzera. Esku pilotan, aerobikean, uztai jokoan, kartetan... era guztietako jokoetan aritzeko aukera izan zuten pilotalekuan, Olanan etxean eta ikastetxean. Eta arratsalde osoan atertu ez zuen arren, asko animatu ziren Uzarraga auzotik ibilaldira egitera. Horren guztiaren ondoren, mokadutxo bat hartu eta dantzarako aukera ere izan zuten. /A.I.

LABUR

Herriko triatletek lan bikaina egin zuten Debagoieneko II. Triatloi lasterketan


Hiru antzuolarrek parte hartu zuten joan den zapatuan Urkulun eta Arrasaten jokaturako triatloi proban. Aitor Larrea hamaikagarren postuan sailkatu zen, 2:07:14ko denborarekin; Julen Gari-tano hamahirugarren, 10 segundora, eta Carlos Baleztena 31. postuan, bi ordu, hamahiru minutu eta 33 segundoko denborarekin.

Musker Oker musika taldearen kontzertua izango dugu bihar, zapatua, Surpe tabernan

Bihar, zapatua, 23:00etan, eskainiko dute kontzertua Surpen. Iaz, urrian, sortu zuten taldea, eta lau kidek osatzen dute: Donostia-ko, Lasarteko, Alzako eta Asteasuko kide banak, hain zuzen ere. Egiten duten musika definitzea zaila dela esan digute: reggaea, popa, rocka, funky-a... era guztietako estiloak nahasten dituzte.

Antzuolako Kirol Elkartekoek denboraldi amaiera ospatuko dute bihar, zapatua

Futbol denboraldia amaitu dela eta, jaieguna izango dute bihar-koa, zapatua, herriko taldeetako jokalariei, entrenatzaile eta zuzendaritzako kideei. Txikiteoaren ostean, afaria egingo dute, eta talde bakoitzeko bi jokalariei onenak sarrituko dituzte afalostean.



Zabalo Iturgintza S.L.
Bidea eginez

Tailerra: Uzarraga bidea, 10. Antzuola. Tf. 943 78 71 78
Erakusketa: Kalebarren, 1. Antzuola. Tf. 943 78 71 79, Tf. eta F. 943 76 64 73

- Gasa
- Berogailuak
- Haie egokitua
- Enpresen mantenimendua
- Lurrin instalazioak
- Bero-urrezteak
- Bainugelak. Proiektuak momentuan DIBaren bidez
- Birgaitze-espeditentak bideratzen ditugu

MUJIKA HARATEGIA



Berezitasunak: Etxean hazitako zekorrek eta oilaskoak

Kalebarren, 1. ANTZUOLA
Tf. 943 76 64 34

LEKY-BERRI MERENDEROA

Janariak eta edariak

Tf. 943 76 60 94
ANTZUOLA